



Ақмешіт

Аялаймын сені, Қызылорда!

24 қыркүйек
сенбі

№76 (1880)

2022 жыл

Газет
1994 жылдың 15 сәуірінде
бастап шығады

Қалалық қоғамдық-саяси әлеуметтік-
ақпараттық тарихи-танымдық газет •
E-mail: akmeshit.kz@mail.ru

апталығы

Мемлекет басшысы Қасым-Жомарт Тоқаевтың Қазақстан халқына үндеуі

Қымбатты отандастар!

Биылғы жыл жан-жақты реформалар мен нақты өзгерістер жылына айналды.

Маусым айында өткен референдумның нәтижесінде билік тармақтары арасында тиімді тепе-теңдік орнады.

Мемлекет «күшті Президент – ықпалды Парламент – есеп беретін Үкімет» қағидасын берік ұстанады. Мәжіліс пен мәслихаттар жаңа аралас жүйе бойынша жасқалды. Депутаттардың бір бөлігі партиялық тізіммен, қалғаны бір мандатты округтен сайланады. Конституциялық сот құрылып, алдағы қаңтар айынан жұмыс істей бастайды. Адам құқықтары жөніндегі уәкіл институты конституциялық мәртебеге ие болды. Биліктің бірқатар өкілеттігі қайта бөлініп, кейбір құзыреттер Президенттен Парламентке берілді. Енді өңірлердің әкімдері баламалы жолмен тандалады.

Конституцияға жер және оның қойнауы халыққа тиесілі деген бап енгізілді. Мен осы ережені жүзеге асыру үшін «Ұлттық қор – балаларға» деген мүлде жаңа бағдарлама ұсындым.

Конституциялық реформа – мен Мемлекет басшысы болып сайланғаннан бері жүзеге асырып жатқан

ауқымды саяси жаңғыру бағдарламасының ажырамас бөлігі. Осы бағдарлама аясында бейбіт жиналыстарды өткізу үшін алдын-ала ескерту тәртібі енгізілді. Саяси партияларды тіркеу рәсімі жеңілдетіліп, тіркеудің қажетті шегі төмендетілді. Сайлау алдындағы партиялық тізімді жасақтау және депутат мандаттарын бөлу кезінде әйелдер мен жастар үшін 30 пайыздық квота енгізілді. Саяси партиялардың Мәжіліске өту шегі 7-ден 5 пайызға төмендеді. Сайлау бюллетендеріне «бәріне қарсымын» деген баған қосылды. Парламенттік оппозиция институты құрылды. Қылмыстық кодекстің 130-бабы қылмыстық деп танылмайтын болды, 174-бабы ізгілендірілді. Өлім жазасы жойылды. Ауыл әкімдерін тікелей сайлау тәсілдері енгізілді. Сондай-ақ басқа да көптеген тың бастамалар жүзеге асырылды.

Жалпы, соңғы үш жылда жасалған өзгерістер мен конституциялық реформа мемлекеттік-саяси құрылымның жаңа үлгісін қалыптастырды. Сондықтан мен Жолдауымда сайлау мерзімін жария түрде және ашық айттым. Осылайша, біз басты мемлекеттік институттар – Президент, Парламент, Үкімет және мәслихаттардың бәрін біртіндеп қайта құрамыз.

Осы бастама жарияланғаннан бері бір айға жуық уақыт өтті. Бұл – барлық мәселені байыппен талқылап, жағдайды бағамдауға жеткілікті мерзім.

Халық біздің саяси жүйені өзгерту туралы қоспарымыздың мән-маңызын жақсы түсініп отыр. Сондықтан мен бүгін бұған дейін айтылған сайлаудың мерзіміне және Конституцияның талаптарына сәйкес, Қазақстан Республикасы Президентінің кезектен тыс сайлауын 2022 жылғы 20 қарашада өткізу туралы Жарлыққа қол қойдым.

Бұл науқан елдің бүкіл саяси жүйесін түбегейлі өзгертетін сайлау кезеңін бастап береді. Сол арқылы экономиканы тұрақты дамытуды, халықтың әл-ауқатын арттырып, тұрмыс сапасын жақсартуды көздейтін ұзақ мерзімді міндеттерді жүзеге асыруға мүмкіндік туады.

Мен Жолдауымда бірқатар ауқымды әлеуметтік-экономикалық шаралар қолға алынатынын жарияладым. Біз оның бәрін жақын арада жүзеге асыруымыз керек. Көп ұзамай қоғамға сайлау алдындағы тұғырнамаларды ұсынамын. Онда әлеуметтік-экономикалық дамуды көздейтін жаңа бастамалар айтылады.

Қазақстан Республикасы Президентінің кезектен тыс сайлауын тағайындау туралы

Қазақстан Республикасы Конституциясының 41-бабының 3-1-тармағына сәйкес ҚАУЛЫ ЕТЕМІН:

1. Қазақстан Республикасы Президентінің кезектен тыс сайлауы 2022 жылдың 20 қарашасына тағайындалсын.
2. Қазақстан Республикасының Орталық сайлау комиссиясы кезектен тыс президенттік сайлауды ұйымдастыру мен өткізуді қамтамасыз етсін.
3. Қазақстан Республикасының Үкіметі кезектен тыс президенттік сайлауды ұйымдастырушылық, материалдық-техникалық және қаржылық қамтамасыз ету жөніндегі қажетті шараларды қабылдасын.
4. Астана, Алматы, Шымкент қалаларының және облыстардың әкімдері сайлау құқығы бар азаматтардың тізімін уақытында жасауды және дұрыстығын қамтамасыз етсін, Орталық, аумақтық және учаскелік сайлау комиссияларына кезектен тыс президенттік сайлауды ұйымдастыру мен өткізу мәселелерін шешуде жан-жақты көмек көрсетсін.
5. Осы Жарлық алғашқы ресми жарияланған күнінен бастап қолданысқа енгізіледі.

Қазақстан Республикасының Президенті
Қ.ТОҚАЕВ
Астана, Ақорда, 2022 жылғы 21 қыркүйек
№1019

Мен Мемлекет басшысы ретінде сайлау науқаны қатаң түрде заңға сәйкес өтетініне кепілдік беремін. Оны отандық және шетелдік байқаушылардың қатысуымен әділ әрі ашық өткізетін боламыз.

Барша азаматтарымызды жауапкершілігін сезініп, демократия, заң және тәртіп қағидаттарын берік ұстануға шақырамын. Еліміздің бірлігі мен тұтастығын қорғаса білейік.

Халқымыздың тағдыры, Қазақстанның болашағы арқайсымыздың қолымызда.

Біз Әділетті Қазақстанды бірге құрамыз!

САПАР

САЛАДАҒЫ САБАҚТАСТЫҚ СЕРПІНДІ ІСПЕН АЙҚЫНДАЛАДЫ



Еліміздің мәдениет және спорт министрі Дәурен Абаев жұмыс сапарымен Сыр еліне келді. Министр сапар аясында облыс әкімі Нұрлыбек Нәлібаевпен кездесіп, бірлескен жұмыстарды талқылады. Аймақ басшысы өңірдегі мәдениет, спорт саласындағы ауқымды жұмыстарға тоқталып, министрлікпен бірге жүзеге асатын жобалар жайлы пікірлесті.

Министр сапары аясында бірқатар мәдени орындар мен спорттық нысандардың жұмысымен танысты. Атап айтқанда, «Мүз айдыны», «Тарлан» спорт кешенінде мәнерлеп сырғанау, грек-рим күресі, көркем гимнастика, ауыр атлетика, бокс, таэквондо секцияларының жұмысымен танысты.

2 БЕТТЕ

МӘСЕЛЕНІҢ МӘНІСІ

Әр істің артында үлкен жауапкершілік тұрады. Мәселен, қандай да бір кішкентай істі бастарда оның қалай аяқталатынын ойлайсың ғой. Сол секілді мына тақырыпты қозғарда «демек сұраныс бар, сондықтан болар жалған құжаттардың жасалып жатқаны» деген ой келгені анық. Сонда осындай үлкен істің артындағы жауапкершілікті ойламайтын болғандары ма? Тауекел, жалғандыққа барғандар жазасын алар. Ал сауатсыз білім алған балалардың не кінәсі бар? Олардың болашағына кім жауапты?



ЖАЛҒАН ДИПЛОМНЫҢ ЖЫРЫ

Елімізде университет құжатын сатып алатындар азаймай тұр

Елімізде жалған дипломмен жұмысқа тұрғандар аз емес. Қазіргі уақытта диплом жасап беретін сайттар да көбейген. Қызығушылық болды. Зерттедік.

Бүгінде талап күшейген. Жалған дипломды ұстап жалпағынан жүру жок. Оқу ағарту министрлігінің хабарлауына сүйенсек, диплом сатып алып сабақ беріп жүрген мұғалімдер анықталса, қомақты айыппұл салынады. Министрліктің мәліметінше, еліміздің Қылмыстық кодексінің 385-бабына сәйкес жалған құжаттарды

жасағандарға 2000 айлық есептік көрсеткішке дейінгі мөлшерде айыппұл салынады не сол мөлшерде түзеу жұмыстарына немесе 600 сағатқа дейінгі мерзімге қоғамдық жұмысқа тартылады. Сонымен қатар 2 жылға дейінгі мерзімге бас бостандығы шектеліп, не сол мерзімге бас бостандығынан айрылуы да мүмкін. Ал жалған құжатты пайдаланғандарға 160 айлық есептік көрсеткішке дейінгі мөлшерде айыппұл салынады не сол мөлшерде түзеу жұмыстарына немесе 160 сағатқа дейінгі мерзімге қоғамдық жұмыстарға тартылады.

3 БЕТТЕ

ҚАЛА КҮНІ ҚАРСАҢЫНДА

Әнге айналған ҚЫЗЫЛОРДА

Туған жеріне жыр арнамаған ақын жоқ шығар, сірә?! Тіпті қолына қалам ұстап, шығарма жазуға шамасы келгенде әрбір бала ең алдымен туған жер туралы жазатыны заңдылық. «Әркімнің туған жері – Мысыр шәрі» деген емес пе? Дарияның жағасындағы қаланы әнге қоспаған ақын кемде-кем. Қызылорда туралы ән-жырға сан жетпес. Дегенмен ел ішіндегі танымал әндерге тоқталғанды жөн көрдік. Сырдария мен Қызылорда егіз ұғым десек артық айтқандық емес. Сырдың жағасындағы ел Қызылорданы жырлағанда, Сырдарияны айналып өтпейтіні де сөзсіз. Сондықтан да туған жерге арналған әндердің ішінде Ә.Тәжібаевтың «Сырдария» атты өлеңінің шоктығы биік. Бала күнімізден жадымызда жатталып қалған болар, біреу тосыннан келіп «Туған жер туралы қандай өлең білесің?» десе, тіл ұшына алдымен абыз ақынның «Сырдариясы» орала кетері анық.



«Білем сені, сүйем сені, Сырдың сұлу қарт анам. Сенсің мені әлдилеген, Туған сенен мен бала» – деп басталатын Әбділда ақынның өлеңі жүректен-жүрекке жеткен, тез жатталатын елге белгілі өлеңдердің бірі. Бұл өлеңге белгілі композитор Бексұлтан Байқенжетов ән жазып, уақытында ел арасында жиі айтылса да, бүгінгі толқынға танымал ән деп айта алмаймыз. Дегенмен аға буын бұл ән шыркала қалса, қомбеден алтын қазына тауып алғандай қуанып, қосыла шырқайды десек, артық айтқандық емес.

4 БЕТТЕ

КЕЛЕСІ САНДА:

Сапалай айтқан
Самалтау



Фото
ашық
дереккөзден
алынды

